

## DEBATE SOBRE O ESTADO DA PROVINCIA 2017

Señoras deputadas, señores deputados, convidados presentes neste salón de plenos, veciñas e veciños que nos seguen en directo a través da páxina web da institución:

Diríxome por terceira vez (logo das sesións de 2014 e 2016) a este plenario nun debate único en Galicia, por innovador e que aínda non se celebra nas outras corporacións provinciais do noso país. Un debate consecuencia dunha das medidas incluídas no Código Ético e de Conduta deste “concello de concellos” da provincia de Ourense, concretamente na disposición adicional quinta que establece a súa celebración no mes de novembro.

Ourense non é unha illa. Estamos dentro dun contexto nacional e internacional onde os movementos xeopolíticos séntense aquí en maior ou menor grado pero sempre con capacidade de influencia no noso entorno. En debates anteriores falei do Brexit, neste toca falar do amago catalán, anticonstitucional e ilegal, que esperemos vexa unha saída ambiciosa coas eleccións autonómicas de 21 de decembro.

Un escenario onde temos que volver a insistir no aspecto máis esencial da convivencia e da boa educación: o respecto. Respecto persoal e respecto político. Quen perde as formas, perde o fondo por moi fundamentado que pense que o ten. Quen non exhibe respecto persoal debuxa unha autodefinición pésima de si mesmo e sitúase nas catacumbas dos valores aos que debemos aspirar.

Por iso, lembraba hai cinco días na entrega do Premio Ourensanía 2017 a esencia do noso pobo, de Ourense, de Galicia, e os argumentos históricos identitarios, moi superiores aos que recorre quen intentou, e segue intentando, vulnerar a orde democrática en España actuando contra a nosa Carta Magna, instrumento útil de convivencia e progreso como ten amosado nos case corenta anos de vixencia. Dicía eu no Teatro Principal que en Galicia, na Gallaecia, no ano 411 d.C, creouse unha entidade política baixo forma de reino que foi a primeira en todo occidente, sete anos antes da constitución do primeiro reino visigodo en Aquitania.

Un feito que adquire unha especial significación no contexto político que estamos vivindo en España, pois Galicia, que posúe argumentos históricos e inequívocos da súa identidade -que funden as súas raíces hai máis de 1.600 anos-, constitúe un exemplo de “nacionalismo” moderado e integrador, nas antípodas das derivas nacionalistas extremistas e excluíntes. Un contexto nacional e internacional que non debemos descoidar cando examinamos o estado da provincia de Ourense, de calquera territorio. Certo: de Ourense para o mundo, centos de exemplos, milleiros na nosa historia. Hai días viamos unha entrevista a Héctor García Tellado, ourensán, Senior Program Manager en Microsoft, cun currículo de exemplo de ilimitada proxección profesional tratándose dun titulado na nosa universidade.

Unha comunidade, a ourensá, onde podemos falar de calquera cuestión, nosa ou supranacional, con aspiracións de seu como colectivo que somos.

Falemos da ordenación do monte, unha das masas forestais máis valiosas de Europa. Falemos do mes de maio de 2018 onde se decide a Vicepresidencia do Banco Central Europeo, unha oportunidade para España de volver ao primeiro plano institucional.

Falemos do mercado ecolóxico, no seu mellor momento, pois estamos no país da UE con máis hectáreas dedicadas á agricultura bio. Porque o orgánico non é unha moda, estamos ante un hábito de consumo. E sabemos que o gran reto é lograr que en 2030 un 20 % do consumo interior sexa de produtos ecolóxicos fronte ao 2 % actual. Velaí unha oportunidade competitiva para Ourense.

Falemos das claves do crecemento: a internacionalización, a transformación dixital, a xestión do talento, a responsabilidade social corporativa..., ámbitos onde esta Deputación está chamada a xogar un importante papel.

Falemos do despoboamento, das conclusións do II Congreso Nacional celebrado en Huesca e onde participamos, falemos da necesidade de normativa específica, de financiamento axeitado e do liderado das entidades locais. Unha provincia, Ourense, cunha idade media superior a 50 anos en 81 concellos da provincia, eses concellos que son os que máis se axustan de Galicia á lei de estabilidade orzamentaria (con 86 cumprindo o equilibrio nas súas contas). Unha provincia, segundo datos de 2015 recompilados polo Consello de Contas de Galicia, que é a que máis fondos por habitante recibiu da Unión Europea: un investimento per cápita de 40,12 euros, sendo a media galega de 17,10 (máis do dobre).

Falemos da cuarta revolución industrial e os seus efectos sobre o emprego. Falemos dun dos nosos produtos estrela, a castaña, que en Galicia fala con datos: exportando a 32 países, facturación anual de 40 millóns de euros do sector, exportando o 90 % da produción e dando traballo a máis de 10.000 persoas.

Falemos dunha evidencia: esta lexislatura debe completarse o AVE a Galicia. A pouco máis de dúas horas da capital da España. Unha España dentro dunha Europa que apela constantemente á innovación para recuperar o liderado empresarial. E remítome ao recente Foro de Diálogo España-Italia coa intervención do primeiro ministro italiano Paolo Gentiloni e unha realidade preocupante como contemplar á ciberseguridade como unha asignatura pendente.

Falemos en Ourense das consecuencias internacionais da reforma tributaria en Estados Unidos porque a nova lexislación terá efectos importantes nos fluxos de capital a nivel global.

Falemos e reflexionemos sobre a frase de Santiago Lago, director do grupo GEN +, colaborador desta Deputación, experto de consenso no proceso de reforma do financiamento autonómico, cando di: “Necesitamos acordos ambiciosos e non disensos reiterados”, referíndose ao Parlamento de Galicia, para que defina e execute as estratexias colectivas que consoliden a competitividade galega.

Falemos da dixitalización como piar mestre da economía circular. Das chamadas “compras verdes” e socialmente responsables, catalizadoras da economía circular en España. Onde o sector público é o maior comprador e contratante de bens e servizos. Sabendo como sabemos que o gasto en compras públicas na Unión Europea ascende ao 14 % do PIB e en España ao 18%. Falemos de temas capitais como a eficiencia enerxética por exemplo.

Permanezamos atentos ao primeiro Smart Mobility World Congress (que remata hoxe en Barcelona), que nos mostra por primeira vez en Europa o Volocopter e fálanos de como aplicar Hyperloop. Esta “provincia intelixente” que hai semanas innovou, da man da empresa privada, á hora de acometer a problemática da avespa velutina.

Falemos da Unión Europea na que estamos que debe compaxinar a política medioambiental coa industrial. Falemos do noso entorno, dos parques industriais que deben renovarse para atraer novos investimentos. Falemos da aposta polo sector agroalimentario, con 218 empresas de Ourense que exportan.

Falemos da multinacional galega líder mundial en pizarra natural, con sede en Ourense, que adquire unha importante importadora americana. Falemos da facultade de informática de Ourense,

canteira de talentos. Falemos das denominacións de orixe que lograron na última campaña a maior facturación dos últimos 10 anos, en paralelo a un forte tirón da exportación. Unhas denominacións de orixe que, afortunadamente, trala vendima, non perderon tanta produción como as previsións iniciais auguraban. Falemos da expectación que xeran os resultados da nova Lei de fomento de implantación empresarial en Galicia. Falemos dos nosos parques empresariais, os segundos en superficie media dos das provincias galegas.

Parques empresariais cos que seguimos abertos a colaborar como facemos co máis grande de Galicia, o de San Cibrao, con 4.800.000 m<sup>2</sup>, máis de 360 empresas e máis de 8000 traballadores.

Falemos sempre, señoras deputadas e señores deputados, coa suficiente perspectiva e con información. Sen dúbida, o contrario da demagogia. Falemos sempre dándonos conta do mundo interconectado onde vivimos e actuamos.

## **A ECONOMÍA OURENSÁ E O MERCADO LABORAL EN 2017. O FUTURO CO EMPREGO TECNOLÓXICO**

Calquera valoración económica que fagamos ten que mirar obrigatoriamente cara os datos e proxeccións do Observatorio Económico Ourenán, un instrumento único no contexto dos gobernos provinciais, que debemos sempre poñer en valor porque nos axuda a facer efectiva a visión integral de provincia que debemos atender e constitúe o elemento obxectivo necesario para acertar nas políticas públicas que poñemos en marcha.

O cambio de ciclo que afronta a economía ourensá desde finais de 2014 perdura no tempo, intensifícase e esténdese ao conxunto dos indicadores. Os números avalan a afirmación de que en Ourense estamos a vivir unha recuperación uniforme e sólida:

- A taxa provincial de paro descendeu ata niveis nunca vistos desde o ano 2009. Está no 15,3% segundo recolle a EPA do terceiro trimestre, e mellorou catro puntos porcentuais no acumulado do ano 2017 (nos nove primeiros meses) e 2,5 puntos na comparativa interanual.
- A taxa de ocupación alcanza valores de récord desde finais de 2011, logo de avanzar un punto e medio desde comezos de ano.
- E a taxa de actividade xa está a acompañar á baixada do paro e á subida dos ocupados, o que sempre constitúe o exercicio máis difícil da tripla reactivación laboral. No terceiro trimestre do ano houbo un incremento de 1.200 traballadores (subida do 0,92%) con respecto ao trimestre anterior, o que permite que a provincia acade o dinamismo que lle aporta sumar 130.000 traballadores activos, chanzo que quedara diluído pola crise.

Por si as porcentaxes non fan xustiza na análise, pode que os valores absolutos retraten mellor o que verdadeiramente está a acontecer en Ourense:

- Hoxe contabilizamos 5.700 parados menos que cando principiou 2017 e 3.900 menos que hai xustamente un ano. O número tan redondo que reflicte a EPA, o de 20.000 desempregados, indica nada máis e nada menos que preto da cuarta parte -o 22,2%- dos parados que sumaba a provincia no inicio de 2017 xa abandonaron esa situación laboral. Baixar o paro un 22,2% en nove meses non pode cualificarse máis que de fito histórico, de gran acontecemento e de nova dificilmente reproducibile mesmo nas economías máis desenvolvidas.
- E hoxe están a soster o mercado laboral ourensán 2.600 ocupados máis que ao peche do ano 2016 e 1.200 activos máis que hai tan só tres meses.

Si atendemos a outro indicador de base, o das afiliacións á Seguridade Social, o trazo verde

aínda se manifesta máis chamativo. A cifra actual de 101.500 afiliados é o valor máis alto en seis anos.

- A provincia xa encadea a marca de trece trimestres consecutivos con aumento das afiliacións en taxa interanual (na comparativa co mesmo trimestre do ano anterior). Pero é que ademais, en sete deses trece trimestres as subas estiveron por enriba do 1%. Un fito máis que afianza a recuperación.
- O saldo nos nove primeiros meses de 2017 foi de 2.230 empregos netos creados no conxunto da provincia. En comparación con xuño, a provincia gañou 2.190 afiliacións nun só trimestre (no terceiro de 2017), máis do dobre que de abril a xuño deste mesmo ano, cando se dera un alza de 1.036 afiliados.
- Se falamos polo miúdo dos motores de creación de emprego, temos que citar en primeiro lugar ao comercio, que segundo a EPA creou 2.500 novos empregos entre xaneiro e setembro deste ano. A continuación salientan a hostalaría, con 2.300; a venda e reparación de vehículos, con 1.100; a industria da alimentación e bebidas, con 1.000; as actividades financeiras e os seguros, igualmente con 1.000; e as actividades profesionais, científicas e técnicas, co excelente rexistro de 900 empregos de saldo neto este ano.
- A recuperación é un feito nos sectores tradicionais da economía provincial, agás na construción, e tamén resulta igualmente palpable e visible no sector tecnolóxico.
- O estudo pormenorizado do sector de vangarda amosa que Ourense colleu a tempo o tren das novas tecnoloxías. E os datos corroboran novamente esta afirmación:

- No último período de doce meses para o que existen estatísticas desagregadas, o emprego dos chamados sectores de tecnoloxía punta, alta tecnoloxía e media-alta tecnoloxía, creceu de media un 5,7% en Ourense. Son 250 novos empregos que sitúan en máis de 4.500 postos de traballo as profesións de elite que se están a exercer en Ourense. Esta evolución corresponde ao período comprendido entre setembro de 2016 e o mesmo mes de 2017.

- Estamos a falar de profesións e de actividades como a industria química; a fabricación de produtos farmacéuticos, ópticos, electrónicos e informáticos; a fabricación de material e equipamento eléctrico; a fabricación de maquinaria; as actividades tecnolóxicas da automoción e de outro material de transporte; o sector audiovisual; as telecomunicacións; a programación e a consultaría informática; os servizos de información; a construción aeronáutica, a fabricación de instrumental e fornecementos médicos e odontolóxicos; e por suposto a I+D+i.

- Son os epígrafes do CNAE -a Clasificación Nacional de Actividades Económicas de España- que toda provincia e que toda comunidade queren ter, protexer e estender, e que en Ourense atesouramos e impulsamos coa boa dirección das axeitadas políticas dunha institución de referencia como a Deputación Provincial.

- Pero resulta, ademais, que si entramos no detalle das profesións que acabo de citar, O Observatorio Económico Ourense permite comprobar que nalgúns grupos a evolución do último ano é sinxelamente espectacular.

- Así, por exemplo, na I+D+i houbo no último ano un crecemento de emprego neto do 32,1%; na programación, consultaría e outras actividades vencelladas á informática o repunte acadou o 25,1%; mentres que noutros tres dos grupos que definen o nivel de desenvolvemento tecnolóxico dun territorio a creación neta de emprego en taxa interanual supera o 8%. Trátase das telecomunicacións, da fabricación de material e equipamento eléctrico e da fabricación de outro material de transporte.

- O acompañamento tamén se está a propulsar desde as actividades tecnolóxicas do sector da automoción, nas que o emprego medrou un 3% no último ano na provincia de Ourense.

- As proxeccións indican que no horizonte do ano 2020 asistiremos á plena recuperación e á estabilización do mercado de traballo ourensán, con máis de 105.000 afiliacións no conxunto da provincia, cunha taxa de paro situada na contorna do 12% ou mesmo por debaixo; e din que seremos unha provincia con máis de 5.000 empregos de tecnoloxía punta, alta ou media-alta.

- O planeamento, a estratexia de reactivación e as políticas que vimos exercendo nesta institución tradúcense hoxe nun modelo produtivo en equilibrio e nun tecido empresarial en crecemento, que sen dúbida van xerar estímulos máis que suficientes para captar inxeccións de investimento tanto privado como público nos vindeiros anos.

- Xunto ao potencial dos sectores tradicionais, como a agroalimentación, o téxtil, o comercio, a pizarra, as enerxías ou a automoción, esta provincia engade o empuxe da economía dixital, da economía verde, da economía social e da industria de nova xeración.

- A Deputación Provincial xa activou todos os mecanismos necesarios para que o pulso dos sectores tradicionais se complemente coa consolidación e tamén coa chegada de empresas de éxito en sectores como a biotecnoloxía, os servizos informáticos avanzados, as novas enerxías, o medio ambiente, os composites e os novos materiais, a automatización industrial, a microelectrónica e a aeronáutica, na que xa contamos cun motor local de tanta relevancia como a factoría de COASA, integrada no grupo Aernnova.

- Imos continuar ademais a aposta polos sectores emerxentes e polas actividades intensivas en coñecemento e en tecnoloxías avanzadas, é dicir, no que conforma o sector high-tech.

- En resumo, o mellor garante do dinamismo e da fortaleza económica, empresarial, industrial e tecnolóxica está na permeabilidade ante a nova economía e ao tempo na potenciación dos sectores que nos identifican lonxe das nosas fronteiras, desde a agroindustria e a viticultura ata a extracción de pedra natural, o téxtil, o comercio, a automoción, o termalismo e o turismo.

## **GOBERNO PLANIFICADOR E INNOVADOR**

Señoras deputadas e señores deputados, veciñas e veciños da nosa provincia, nos doce meses precedentes esta Deputación amosou con contundencia a súa utilidade ao servizo dos intereses provinciais. En tódolos eidos realidades.

Cuestións non contempladas no Plan de Mandato Ourense 15-19, cuestións innovadoras, mostra da capacidade propositiva e de vangarda deste goberno provincial. Velaí esas realidades, que conformaría por si sos un novo e completo Plan de Mandato.

**No ámbito da cultura e da autoidentificación:** a celebración do congreso internacional sobre San Martiño de Tours, o apoio á rehabilitación do poboado romano de Bande, a posta en funcionamento da rede provincial de espazos culturais, a constitución da comisión provincial de patrimonio... o Premio Estatuto de Autonomía na súa cuarta edición, a implicación na celebración das Letras Galegas na honra de Carlos Casares (a quen concederemos a Medalla de Ouro da provincia) colaborando coa Fundación que leva o seu nome –mesmo dedicando un monográfico da revista Raigame-, creando o premio “Rodolfo Prada” ao mellor xestor cultural de Galicia, os campamentos da Ourensanía no Corgo –Muiños-, a adquisición do arquivo de La Región e La Región internacional e os seus suplementos, promover os concertos de música medieval en Oseira-Santo Estevo e Montederramo a cargo de Carlos Núñez, organizar o primeiro ciclo de cinema euro-árabe “Amal”, botar a andar a Fundación Eduardo Blanco Amor, celebrar a Ourensanía de 2017 con

Miguel Ángel González e dedicar o 2018 á memoria de Ben-Cho-Sey, iniciar o expediente para a declaración como BIC da Ribeira Sacra, os concertos da Ourensanía coa Coral de Ruada, ofrecer a nosa dispoñibilidade para colaborar na execución do Plan Director do Mosteiro de Montederramo, o apoio á Fundación Carlos Velo, o movemento para relanzar a figura de Florencio Delgado Gurriarán.

**No apartado social:** a alianza co Banco de Alimentos de Ourense, os acordos con Cruz Vermella, a constitución do Consello Social Provincial con 24 entidades sociais da provincia, a cooperación coa mancomunidade de concellos de O Carballiño, a colaboración con CEGASAL para o acceso ao mundo laboral das persoas con discapacidade, o primeiro Foro Social Provincial, o primeiro Plan de Igualdade de oportunidades entre mulleres e homes.

**Na área institucional e de funcionamento en rede con outros gobernos e institucións:** a participación nas conferencias de presidentes de Badaxoz e Segovia, a cooperación con Melgaço para proxectos europeos transfronterizos, a sinatura con RENFE do convenio para promocionar a provincia como destino termal, a sinatura co grupo GEN+ para liderar dende Ourense os estudos sobre municipalismo en España, as reunión en Ourense do comité técnico de Partenalía e a xuntanza extraordinaria do seu consello político que tamén presidín en Bruxelas, a cooperación co Concello de Ourense para desbloquear 25 proxectos e 10 millóns de euros en investimentos, o noso papel activo na comisión de deputacións, consellos e cabildos insulares da FEMP, a capacidade de proposta e protagonismo na comisión permanente da Fundación Democracia e Goberno Local que agrupa a 25 gobernos provinciais de España, exercer con responsabilidade a vicepresidencia da Federación Nacional de concellos e asociacións de concellos con embalses e centrais hidroeléctricas, a nivel internacional desempeñar a vicepresidencia de Partenalía –a asociación de gobernos provinciais de Europa- ou a vicepresidencia da EHTTA, froito da decisión unánime dos membros desta organización na que están representados 50 emprazamentos termais de trece nacións, recibir o apoio da Unión Europea para tres proxectos da Deputación con Portugal, participar activamente no Primeiro Cumio Hispano-Luso (o primeiro en democracia) de gobernos locais en Coimbra para potenciar a cooperación transfronteriza, colaboración coa CEO en formación en comercio internacional, crear unha comisión de incendios forestais e de emerxencias.

**Na estratexia de goberno aberto e de apertura veciñal:** a semana escolar da provincia; a xornada de portas abertas que neste mes volverá a realizarse de novo; protagonizando un relatorio na UIMP nun curso de verán sobre os gobernos provinciais; volver a ser a primeira administración pública en España en aprobar os orzamentos do ano próximo.

**No apartado de creación de emprego:** o primeiro plan piloto de emprego tecnolóxico entre Deputación e Viewnext (grupo IBM) coa EOI, a sinatura dun novo Plan “Activamos Ourense” con ABANCA, a II misión comercial cos Estados Unidos, a misión empresarial-científica- institucional a Israel (unha estratexia coa que continuaremos nos próximos meses, singularmente para apoiar ás empresas de Ourense na internacionalización nos mercados latinoamericanos e asiáticos), a avaliación do programa Ourense Líder, a cooperación coa CEO, coa Cámara de Comercio e Círculo de Empresarios de Galicia, o Plan Exportou coa CEO e misións comerciais con Xapón e Alemaña, xestionar máis de 1,6 millóns de euros para fomentar o emprego xuvenil.

**Procurando o mellor para os nosos sectores produtivos:** xuntanzas cos consellos reguladores, con asociacións de produtores como a de aceite de oliva de Galicia, organizando foros como o workshop que celebramos da man do Grupo Colmeiro, reunións con organizacións sindicais para avaliar os efectos dos danos meteorolóxicos na provincia.

**Poñendo como prioridade o medio ambiente:** as alianzas coa Waterkeeper e o ASBC, a “declaración de Ourense” aprobada en Partenalía que fixa un pacto interprovincial europeo pola

sustentabilidade.

**No apartado de cooperación cos concellos:** o programa para a adquisición de desfibriladores, as xuntanzas en concellos e mancomunidades como a de Verín, o sistema de xestión electrónica posto a disposición dos concellos da provincia, o programa piloto “revivenda” en Oimbra e A Veiga, apoiando aos afectados pola modificación da demarcación dos rexistros da propiedade, poñer en marcha o Parque de bombeiros do Carballiño –dará servizo a 48.000 habitantes de 23 concellos-, un servizo de recollida de aceite de orixe doméstica, posta en marcha completa do Consorcio Provincial de Incendios, a decisión de situar en Castro Caldelas o Museo Antropolóxico da Ribeira Sacra, liña de cooperación para elaborar os plans de prevención municipais previstos na normativa e dispoñibilidade para axudas sociais e de infraestruturas a causa dos incendios.

**Liderando a transparencia** implantando un sistema de avaliación en tempo real, celebrar a VI Xornada das deputacións do futuro coa temática da “transparencia e protección de datos no ámbito local”, organizando en Ourense o Congreso Nacional da Red Localis para falar de transparencia e innovación nas entidades locais, liderando os gobernos provinciais de España en transparencia e comunicación política vía Twitter.

**No ámbito do ensino:** sendo fundamentais no ensino universitario cos convenios co Campus de Ourense e no Padroado da UNED que teño a honra de presidir, sete cursos de extensión universitaria no Campus, investir –xunto co goberno autonómico- 630.000 euros en obras de mellora en 42 centros educativos da provincia, as bolsas “Ourense exterior” para financiar estudos de mestrado a cinco estudantes estranxeiros.

**Estando atento á situación de entidades representativas** como o Ateneo de Ourense, ou asinando convenios como coa Asociación de Empresarios de Valdeorras, colaborar coa Federación de Comercio para realizar un estudo innovador que analice produtos-servizos-e perfís sociodemográficos, a alianza coa Ruta do Viño do Ribeiro...

**En cuestións de termalismo e turismo:** o programa de termalismo saudable de 2017, a presentación en FITUR do xeodestino turístico “Manzaneda-Trevinca”, a presentación en Bruxelas do “Atlas Termal”, o programa provincial de entroidos 2017, participar na apertura do novo balneario de Partovia, presentar o Pacto Termal Nacional en Caldas de Reis no encontro de Vilas Termiais de España, facer realidade en Ourense o III Encontros do clúster de turismo de Galicia, presentar da man da Facultade de Medicina da USC o “vademécum do termalismo de Galicia”, apoiar a celebración en Foz de Iguazú de Termatalia en 2018, formar parte de La Vuelta en 2017 promocionando a provincia termal, presentar ao Goberno de España un plan da FEMP de dinamización rural baseado no termalismo, organizar un curso de especialización en técnicas de benestar.

**Estando presente tamén no ámbito da innovación:** organizando o I Congreso internacional de drones, inaugurando o foro “Territorio intelixente” en Compostela, a ICC Week 2017 como referente de vangarda creativa, o Mercado do Xurés en Bande, recibindo o premio dos enxeñeiros informáticos de Galicia polo mellor proxecto innovador dunha administración pública (“Provincia intelixente”), recibir o premio ao mellor proxecto de contratación pública electrónica en España, organizando o primeiro curso de piloto de drones para emerxencias con homologación oficial en España.

**Na atención aos máis novos:** o programa “Chegou” de axudas á natalidade, os plenos infantís, xornadas formativas con colexios sobre o bo uso da auga, acordar que en 2019 Ourense acollerá a olimpíada matemática, cos mellores estudantes da ESO e de Bacharelato de España.

**En materia de deporte:** facer realidade as guías do fútbol provincial, o sistema de innovación que

se está a executar agora mesmo en Manzaneda, apoiar a presentación da candidatura e obter a responsabilidade de organizar en Ourense en 2018 o Campionato de España de baile deportivo, deseñar e executar-cooperando coa Xunta- un plan de infraestruturas deportivas cun investimento superior a 1 millón de euros.

**Poñer en valor realidades** como que Ourense conta co centro de control hidrolóxico máis moderno de Europa, en Velle, seguir apostando pola Festa da Palabra como mostra da nación cultural na que vivimos.

## **CARACTERÍSTICAS DO GOBERNO PROVINCIAL**

Señoras deputadas, señores deputados, a provincia ten goberno de seu: a deputación. Un goberno cooperador con concellos, goberno autonómico, goberno central e unión europea..., pero fundamentalmente cooperador coas veciñas e veciños da provincia. Velaí a nosa esencia: a cooperación, básica para materializar proxectos. Palabra clave na prestación dos servizos que contén a Carta da institución.

Un goberno transparente, o máis transparente dos gobernos provinciais de España. Un eixo estratéxico e transversal desta deputación. Inherente á participación e á información ás veciñas e veciños, aspecto este, o da comunicación política, no que tamén lideramos aos gobernos provinciais de España.

Un goberno que xestiona economicamente con rigor e responsabilidade. A primeira administración pública de España en contar cos orzamentos aprobados para 2018, como xa fixemos en anos anteriores. E como faremos en 2018, aprobando os orzamentos para 2019 o día 28 de setembro. Unha planificación e previsibilidade que fan que todos gañen en seguridade xurídica e que a partir do 1 de xaneiro estean plenamente operativos.

Uns orzamentos que son os do emprego e da cooperación, pero tamén os que priorizan as cuestións sociais, as medioambientais e as de infraestruturas, convertendo a esta deputación no mellor aliado dos concellos.

Un goberno para unha provincia que, coa chegada da alta velocidade, máis cedo que tarde, vivirá un momento que temos que aproveitar. Estar a pouco máis de dúas horas de Madrid, sen dúbida xerará oportunidades para os sectores que identifican a nosa actividade económica: un revulsivo histórico para o noso termalismo, o turismo cultural, a nosa etnografía, o noso sector agroalimentario... que complementen o liderado xa real en áreas como a pizarra, o téxtil, mesmo a innovación tecnolóxica e a nosa riqueza paisaxística e medioambiental con enclaves únicos como a Ribeira Sacra para a que seguimos traballando cun obxectivo irrenunciábel: conseguir que a UNESCO a distinga como Patrimonio Mundial.

Unha provincia de Ourense que nestes anos viu como contamos con infraestruturas de relevo nos servizos públicos esenciais. E basta citar o novo edificio xudicial, o novo hospital de vangarda, as comunicacións coas terras de Celanova, o novo edificio do Campus da auga.

## **UN GOBERNO CON CAPACIDADE DE REACCIÓN**

Unha provincia cun goberno de seu, preocupado por contar cun mapa de emerxencias no que a deputación desenvolve un papel básico: cofinancia o consorcio provincial de incendios, asume o 40 % dos gastos dos Grupos de Emerxencia Supramunicipais (facéndose cargo tamén da parte que lle correspondería aos concellos), ten un rol fundamental en servizos de bombeiros como o da asociación de empresarios de San Cibrao ou os da mancomunidade de Celanova, e estuda algunha fórmula de colaboración coas agrupacións de protección civil existentes na provincia.



Unha administración que colaborou, colabora e colaborará coas outras administracións na loita contra a lacra dos incendios, tanto nas labores de prevención como de extinción. E que conta con capacidade propositiva para avanzar aínda máis, e como exemplo temos a moción sobre incendios forestais e emerxencias que aprobamos no mes de outubro.

**SEÑORAS E SEÑORES TEMOS VOCACIÓN CONSTRUCTIVA. ERGUÉMONOS CADA MAÑÁ PARA FACER COUSAS POR OURENSE. OUTROS PARA QUE NON AS FAGAMOS. ESA É A DIFERENCIA**

Agradezo profundamente as achegas positivas e construtivas dos grupos políticos. Representan dez propostas (en tres grupos políticos) que é quintuplicar o esforzo dun pleno ordinario, velaí a importancia deste debate sobre o estado da provincia (Xaén 22/09, Córdoba 28/xuño, Granada 24/10, Castellón, Málaga, Burgos..., tamén a nivel de cidade ou concello).

Sempre digo que esta deputación ten que estar atenta a calquera proposta que vexamos útil para a provincia, con independencia de quen a pense ou imaxine. Somos unha “administración esponxa” que debemos incorporar de xeito permanente e natural ideas e procedementos que nos fagan mellores, máis eficaces e máis eficientes. Porque a administración pública é un terreo perfecto para a innovación.

Escoitarei con atención as súas intervencións no que resulten de positivas para o presente e futuro de Ourense.

Moitas grazas pola súa atención e bos días.